

Bouônjour tout l'monde ch'est Jon Osmont tchi vos présente la lettre Jèrriaise aniet lé 21 dé Févri 2026.

Tchi temps qu' j'avons ieu ch't'année! l' sembl'ye qué j'avons raiqué d'la plyie et hardi d'vent. La tempête Goretti causit un tas d' problèmes auve les bouais tchiant et l'électricité fut copée. Ichîn dans Saint Ouën j'n'eûmes pon d'électricité pour tchînze heuthes! l'fallit faithe sèrvi les chandelles pour la veue et mettre un tas d' bûches pour faithe du feu pour s'garder caud. Ch'na n' fut pon un problème et les hommes d'la compangnie d'l'électricité travaillîtent dû pour èrjoindre lé sèrvice par méjeu du jour suivant. J'avons ieu un mio dé damage sus lé lief mais les r'pathes s'emmanchîtent.

Par eune coïncidence supprannante la compétition d'la section du Jèrriais à l'Eisteddfod prînt pliaiche tchiques jours auprès la tempête Goretti. J'competis dans ieune des clâsses tchi nos oblygit à liêthe eune poésie dé not' chouaix d'eune liste. Touos les compétiteurs chouaisîtent eune poésie intitulée "Tchi Temps" par Frank le Maistre. La poésie décrit lé temps d'Hivé. Eune lîngne dé la poésie décrit les longues séthées freunmés dans la maïson et l'enniêthie. l'fallait qué touos les compétiteurs sûtent au sujet d'la tempête en avanche pa'ce qué j'chouaisînmes la poésie duthant les s'maines dévant Novembre.

Enfin, les longues sombres séthées, nos donnîtent l'opportunité à rêver au sujet du temps caud dans l'Été tchi veint. J'pouvons penser ès vacances et les touônées qué j'féthons. J'avons déjà fait nos demathéments pour l'Été et ch'na nos fait oublier lé mauvais temps.

Ma bouonfemme Jill a eune couôsîne tchi d'meuthe, auve san bouonhomme, au Cannada sus l'île dé Vancouver. J'l'avons visité en plusieurs occâsions et not' fil'ye et not' bieu-fils sont d'hait dé v'nîn étout.

Not' fil'ye avait déjà, boutchi les vols dé Jèrri à l'île dé Vancouver. Oulle est eune grand' croyante tchi faut faithe toutes les choses tout d'siette. J'îthons au Cannada pour trais s'maines, en Août, avec Jo, Dan et not' p'tit-fis Loïc. La couôsîne dé Jill d'meuthe à Qualicum Beach près d' la grève. Ch'est hardi bein pour not' p'tit-fis. Ch'est pus facile pour aller à des tas d' pliaiches sus l'île. J'pense qué la dgett'tie des baleines est eune possibilité. Et, pour ma fil'ye et man bieu-fils la pédal'lie dans les bouaïs'sies et les montagnes s'sa hardi populaithe. J'îthons étout à Tofino sus la côte Pacifique auve ses grandes grèves et les belles p'tites caûchies. Eune expédition à la stâtion dé ski à Whistler pour deux'-trais jours est étout eune possibilité. Ch'est hardi excitant pour toute la fanmil'ye.

D'avant ch't' aventuthe, au Cannada, Jill et mé îthons en France et en Espangne dans not' camping-car. Ch'na s'sa en Mai et Juîn et j'espéthons qu'i' f'tha bé. Tchi difféthence qué l' temps ichîn en Jèrri!

Auprès les viages, excitant, en France et au Cannada j'pass'sons du temps auve man frêthe et sa bouonnefemme en Sèr restant à Stocks Hotel. Ch't' hôtel est ieune dé nos favorites pa'ce qu' oulle est hardi confortabl'ye et l'restaurant est mangnifique. À cause dé touos les problèmes auve les vols entre Jèrri et Dgèrnésy j'boutchînmes les

titchets hardi vite auprès qu'la chédule a 'té publiée. J'sis dév'nu comme ma fill'ye. Ou fait tout hardi vite.

Et don, j'faïthons tout pliein d'plian'nie d'viages pouor êcliaithi les longues sombres séthées.

Et bein bouonnes gens n'en v'là assez pouor chute semaine. Mercie pouor m'aver êcouté à matîn. J'espéthe qu'ous éthez des bouonnes vacances l'Êté tchi veint.